

समे – 12:25

<><><><><>

Budget Session LG

जम्मू-कश्मीर विधानसभा दा बजट इजलास, लेफ्टिनेंट गवर्नर मनोज सिन्हा हुंदे उद्घाटनी सम्बोधन दे कन्नै अज्जै थमां जम्मू विधानसभा परिसर च शुरु होई गेआ ऐ। अपने भाषणै च एलजी होरें आखेआ जे बजट, अपने आपै च ऐतिहासिक होग कीजे पिच्छले 7एं ब'रें च पैहली बारी जम्मू-कश्मीर च इक चुनी दी सरकार आसेआ एह बजट पेश कीता जाहग। उ'नें आखेआ जे एह बजट, लोकें दी ताकत गी दर्शाने आह्ला होग। श्री सिन्हा होरें आखेआ जे एह बजट छड़ा इक माली दस्तावेज गै नेई सगुआं एह इक सनैहरी भविष्य लेई लोकें दिए आसैं-मेदें गी दर्शाने आह्ला बजट होग। अपने संबोधन च एलजी होरें इब्बी आखेआ जे सरकार, जम्मू-कश्मीर दा राज्य दा दर्जा बहाल करने दी मंग गी पूरा करने लेई वचनबद्ध ऐ ते एह लक्ष्य हासल करने लेई सब्बनें सरबंघत धड़ें कन्नै बरोबर गल्लबात कीती जाहग। एलजी सिन्हा होरें महिलाएं गी बाअख्तियार बनाने, राई-बाई दे बेहतर ते टिकाऊ तौर-तरीकें गी बढावा देने, संपर्क सरिस्ते च बाददा करने, युवाएं गी सशक्त बनाने ते जम्मू-कश्मीर गी शिक्षा दे इक बड्डे ते प्रमुख केन्द्र दे तौर उपर स्थापित करने सने होरनें महत्वपूर्ण मामलें पर बी लोऽ पाई। उ'नें आखेआ जे युवाएं गी आत्म-निर्भर बनाने सने स्टार्टअप तंत्र गी बढावा देने कन्नै जम्मू-कश्मीर, तरक्की-बाददे आहले इक नमें जुग दा गवाह बनै करदा ऐ। उ'नें गलाया जे सरकार, केन्द्र शासित प्रदेश च पंचैतें ते शैहरी मुकामी निकायें दे चुनाऽ बेल्ले सिर करोआइयै इ'नें इदारें गी आख्तियार बनाने लेई बी वचनबद्ध ऐ। अज्जै थमां शुरु होए दा एह बजट इजलास, हंमागेदार रौहने दे असार न कीजे बीजेपी सने होर दुए बरोधी दल, जि'आं पीडीपी ते पीपुल्स कांफ्रेंस नै बी केई सारे मामलें गी लेइयै सरकार गी घेरने दी योजना बनाई दी ऐ।

<><><><><>

PMAY Doda

डोडा जिले च प्रधानमंत्री आवास योजना तैहत हासल प्रगति गी होर अगगे बधाने लेई डिप्टी कमिशनर हरविंदर सिंह होरें इक महत्वपूर्ण बैठक लाई। इस मौके पर ग्रामीण ते शैहरी हाउसिंग प्रोजेक्टें, लाभार्थिं सरबंधी प्रगति ते माली मदाद जारी करने जनेय कम्में दी स्थिति दा मूल्यांकन करने बक्खी चेचा ध्यान दित्ता गेआ।

इस मौके उपपर डिप्टी कमिशनर होरें बकाया पेदे घरें दा निर्माण कम्म सबूरा करने लेई 31 मार्च 2025 दी समें—सीमा मुकरर कीती। उ'नें आखेआ जे इ'नें कम्में दी नियमित निगरानी दे कन्नो—कन्नी बक्ख—बक्ख मैहकमें दे अधिकारिएं बशकार तालमेल बनाइयै कम्म कीता जाना लोड़चदा ऐ।

<><><><><><>

Watershed Jammu

जमीनें दे टिकाऊ प्रबंधन ते पानी दी सांभ—संभाल गी बढ़ावा देने दी इक बड़्डी पैहलकदमी दे तैहत्त जम्मू दे भलवाल ब्लाक आसेआ प्रधानमंत्री कृषि सिंचाई योजना दे दुए चरण हेठ राश्ट्रव्यापी वाटरशैड जात्तरा दे इक हिस्से दे तौर उपपर महत्वपूर्ण कार्यक्रम दी मेजबानी कीती गई। जम्मू—कश्मीर च 5 लक्ख शा मते लोकें तोहड़ी पुज्ज बनाई चुके दे इस अभियान दा मकसद, वाटरशैड सरबंदी असरदार विकास रणनीति दे राहें मुकामी समुदायें गी सशक्त बनाने पर ध्यान केन्द्रित करना ऐ। इस कार्यक्रम दे तैहत्त केई सारे महत्वपूर्ण वाटरशैड कार्यक्रमें दा ई—उद्घाटन कीता गेआ ते राई—बाई उत्पादन च सुधार ते लम्मी मुद्धत आह्ली ग्रामीण आजीविका जकीनी बनाने दे महत्त्व पर लोऽ पाई गई।

<><><><><><>

Udhampur Farmers

तकरीबन 5एं म्हीनें थमां चलै करदे सोक्के ज्नेय हालात दे मगरा जंदे किश दिनें दरान होई दिएं बरखें करी उधमपुर जिले च करसान मते खुश न कीजे उ'दे आसेआ राही गेदी फसलें खासकरियै स्ट्राबेरी लेई उ'नेंगी बरखा दी बड़ी मती लोड़ ही। इस पर खुशी जाहर करदे होई इ'नें करसाने मेद बुज्झी ऐ जे बरखें करी उंदी फसलें च नमीं जान औग ते उनें'गी बेहतर ते मय्यारी झाड़ हासल होग।

<><><><><><>

Nasha Mukht Rajouri

नशा मुक्त भारत अभियान दे तैहत्त इक महत्वपूर्ण पैहलकदमी करदे होई सुंदरबनी आहले सरकारी डिग्री कॉलेज आसेआ इक जागरूकता कैप दा आयोजन कीता गेआ जेहदा मकसद नशीले पदार्थ दी कवैतू पर रोक लाना ते नशा—मुक्त समाज दे निर्माण गी बढ़ावा देना हा।

रजौरी दे डिप्टी कमिशनर अभिषेक शर्मा हुंदे निर्देशों पर आयोजित कीते गेदे इस कैंप च 300 शा मते विद्यार्थिएं पूरे जोश कन्नै हिस्सा लैता। इस मौके उप्पर नुक्कड़ नाटक, गीतें ते शायरी दे राहें नशे दी कवैतू शा बचने दे संदेस दित्ते गे।

<><><><><><>

Annoncement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह् कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>